

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 64 (1979)
Heft: 12

Artikel: Las mineras da Punteglias sur Trun ed il pader Placi Spescha
Autor: Fravi, Paul
DOI: <https://doi.org/10.5169/seals-882373>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>

Las minieras da Punteglias sur Trun ed il pader Placi Spescha

da Paul Fravi

Pli baul eran las minas l'unica industria dil Grischun. Ellas ein spatischadas egl entir Cantun ed ein fetg veglias; pusseivel eisi ch'ellas date-schan aunc dil temps avon ils Romans. Dapi ch'ei exista documents sur da nossas minieras – e da quels dat ei pér dil Temps miez – ein ellas mai stadas lucrativas ed han, viu alla liunga, adina luvrau cun deficit. Il Cantun Grischun enconuscheva ed enconuscha buca il dretg e regal da miniera. Per dar la concessiun d'explotaziun d'ina mina eran sulettamein las vischnauncas cumpetentas, e quei cugl effect che spért da partida u scuidonza fuvan savens decisivs e che las minas vegnevan pirentas. Ils interprendiders disponevan ni da mieds e mesiras necessarias ni dad enconuschienschas sufficientas per far l'explotaziun raziunala e rentabla. Quasi tut las minas en nies Cantun sesanflavan en loghens aults e priglus. Il transport dallas virtualias dils miniers si cuolm e dils minerals explotai a val era fetg stentus e custus, ed il temps da luvrar era ualti limitaus e restenschius il bia sils meins da stad. Tut quei contribueva a far il recav pauc rendeivels.

Tut quellas ponderaziuns valevan era per las minas da Punteglias, e quei malgrad las meglieras intenziuns dil pader Placi Spescha dalla Claustra da Mustér, lur iniziant e pionier. Entras el ei quella miniera vegnida, sil-meins per in cert temps, la pli impurtonta dall'entira Surselva. Tochen 1461 era l'alp Punteglias en possess dalla Claustra da Mustér, che surdava ella alla vischnaunca da Trun, conservond denton il regal suveran. Igl onn 1694 surdat gl'avat la mina da Punteglias e quella da Nadels sur Trun per tscheins ad in cert Johann Heinrich Steiner da Winterthur, ed in pèr decennis suenter, 1752, ad in barun Buol de Schauenstein da Rehenau. Omisdus exploteschan la mina, sco ei para, senza success, e Punteglias croda en decadenza ed emblidonza. Ils scumbegls d'uiara dils onns 1799 e 1800 eran vargai, mo havevan laschau anavos ina cuntrada devastada ed ina populaziun depauperisada, en tut ina miseria completa ell'entira Surselva. Gl'intent da pader Placi Spescha era da gidar ses cumpatriots e menar els ord quella pupira procurond ad els novas fontaunas da gudogn e prosperitat. El visitava enqualga la cuntrada da Punteglias e in di digl onn 1817 anfla el leu in grev crap che cunteneva tenor l'expertisa ch'el ha-

veva fatg far irom, fier ed argien ed empau aur. Cul datum dils 4 da matg 1818 ha el secret en sia «Disertaziun. Sur l'envenziun dils Minerals da Punteglias digl onn 1817–1818» alla vischnaunca da Trun che la vischnaunca hagi treis inimitgs: l'aua, las lavinas e la paupradad. Tenor el seigi ei ina obligaziun da diminuir quella paupradad e quei seigi pusseivel entras l'explotaziun dallas minas da Punteglias che porti gudogn e profit all'entira populaziun. Cun buna raschun san ins numnar il pader il promotur spirtal dallas minas da Punteglias. Cuort suenter, ils 3 da fenadur 1818, cumpara en lungatg romontsch e tudestg siu «Plan, co la miniera da Punteglias dueigi esser drizzada en ed exercitada afin ch'ella porti in brav gudogn». Fetg extendiu ed en viarva originala engrazia el igl emprem a Diu per la scoperta da quels minerals e per ils luvrers d'explotar els. El stabile-scha liungas reglas e statutas che tunan per part sco aforissem e vers morals. Aschia scriv'el p.ex. «Tgi ch'ughegia nuot, gartegia nuot», ni «Tgi che ughegia enzatgei silla benedicziun e sin cussegls da carstgauns prudents fa negin puccau», e aunc pli claramein all'adressa da ses cumpatriots «Gi a mi, Trun, speras ti gudogn, spetgas utschals barsai en tes mauns senza che ti sedetties breigia?». En quellas statutas fixesch'el detagliadamein il proceder ed ei aschi segirs da sia caussa ch'el excloma: «Trun, seigies prudents e buca tups; teidla sche Diu cloma tei tier tiu gletg sch'el vul dar a ti ses scazis; clauda buca tes eglis! Accepta ad engraziond: igl ei la buntad da Diu che vul far tei ventireivels.»

Sco experts ed emprems menaders dallas minas ha il pader anflau Peter Heinrich Karg e Ferdinand Pfersich da Bregenz e Michael Versell da Bludenz che fan ils 21 da matg 1817 in contract culla vischnaunca da Trun, tenor il qual la vischnaunca surlai ad els la miniera per 200 fl. (in flurin valeva da gliez temps, ca. 1,75 frs.) tochen la fin digl onn. L'interpresa vegn spartgida en tal senn ch'ina part surpren la vischnaunca e l'autra Karg, mintgin cun 64 parts ni aczias. Karg, suenter haver pagau ora ses dus socis, meina dacheudenvi persuls la fatschenta. Malgrad che ses attestats confirmavan ad el vegn onns activitat en outras minieras, vegn el a Punteglias, per differents motivs, bingleiti en difficultads. In cert Peter Demenga da Calanca e negoziant a Glion, in subject ualtri dubius che fuva era engaschaus ella miniera 'Sulegl d'aur' al Calanda, profitescha da quella situaziun e capescha cun schenghetgs ed auters mieds da surprender la successiun da Karg. Ina societad vegn fundada che engascha Demenga sco directur, Karg sco cau dils miniers, Lt. Lorenz sco cassier, mistral Grisch sco controllader ed Anton Decurtins sco administratur, pia ina cumbinaziun dil tut nova dall'emprema societad.

La primavera 1819 fan ins vegnir in expert, Heinrich Schopfer da S. Gagl, in scienziau, sco il pader numnav'el. El constatescha che las minas da Punteglia cuntegnien mineral da fier, irom, argien, aur e vitriol, e ch'il vitriol persul savessi bunamein cuvierer tut las spesas dall'explotaziun dalla miniera. Il settember viseta in Talian, Staffoni da Brescia ensembe cul derschader Lorez da Spilgia Punteglia. Omisdu spendan grond laud, e Lorez va schizun aschi lunsch schend che Diu sez hagi svidau ils scazis dalla patria sin Punteglia, e Staffoni manegia che, sch'el havessi saviu avon d'in tal scazi, havessi el bandunau sias minas dalla Val Schom e füssi vengnius cheu. Igl ei da dubitar schebein in tal ludem fuva manegiaus seriusamein; en mintga cass daventa Staffoni administratur dalla fatschenta sin recumandaziun dil Lorez. La disillusio fa denton buca spitgar ditg.

Sche il pader haveva numnau las minas da Punteglia in regal da Diu, han ils carstgauns lavagau ellis. Gnanc dus onns pli tard, il schaner 1821, conceda Placi Spescha en siu scret «Sbagls ch'ins ha commess ella miniera da Trun dapi gl'onn 1817» tut las errurs schabegiadas duront quei cuort temps. Cuortamein resumescha el l'entira historia da Punteglia aunc inaga menziunond co las minieras havevan priu lur entschatta, defendea la gestiun da Karg e persequitescha il svilup da Punteglia tochen l'entrada en uffeci da Staffoni. Cun quel fan ins l'entschatta digl onn 1820 in contract per quendisch onns. Tenor il pader fuva quel «naivs e vergognus», senza denton dir tgi ch'ei staus il promotur da quei document. Senza s'informar schebein Staffoni seigi mineralog, geolog ed in um honest, confidan ins ad el in domini bunamein illimitau sur dallas minas. Ins dat ad el sis acczias e lai separticipar el dalla tschunavla part dil gudogn. Siu nevs Rizzi daventa correspondent e duront l'absenza da Staffoni vice-directur e Johann Baptista, era el da naziunalidad taliana, minister da lavur. Il persunal da luvrers consisteva da circa duatschien Bergamascs e Breschans e d'in pèr Svizzers e Tirolès, aschia che quasi l'entira fatschenta era en mauns talians. Il pader selamentava ch'ils Talians mazzavien cun lur fisis (buis) e tgauns da catscha tut ils camutschs, tut las muntanialas, lieurs, uolps e tut l'utschleglia. Las cauras ch'els tenevan per lur diever, eran senza pastur e caschunavan grond donn allas pastiras.

Il Staffoni engascha glieud che capescha aschi pauc sco el, e l'entira explotaziun munta ina surgudida. Ils baghetgs ein buca vegni plassai el dretg liug e ston vegnir translocai cun gronds cuosts. Per proteger quels stabilimenti e cun els gl'entir vitg dad auas grondas e lavinas fuva la societad vegnida advertida da baghegiar gronds e fermi mirs, mo nuot ei vengniu fatg en quei grau. Pér suenter trestas experienzas han ins construiu ils davos onns grondas lavineras en quella cuntrada.

Il luentader Paulin Andér dil Piemont, engaschaus ella miniera da Punteglia sia dal temps da Demenga, che haveva lavagau bia ed entras sia schliata laver caschunau gronds donns alla societad, sa salvar malgrad tut sia piazza e mo perquei, sco il pader manegiava, ch'el era Talian. Staffoni s'occupava memia pauc dalla fatschenta e surlaschava ina gronda part da sias obligaziuns a ses collaboraturs subordinai. Dasperas possedeva el aunc ina miniera a Sufers che pretendeva bia da siu temps. Senza informar ses socis pren el si daners, in import da biabein 10 000 fl., in buordi memia grond per la interpresa. Il vicedirectur fageva buca meglier e mirava avon tut, sco siu aug Staffoni, sils interess da sia atgna naziun. Era il transport dalla lenna ch'ins stueva far vegnir per part da lunsch caschunava difficultads e gronds cuosts.

Pader Placi Spescha, sco promotur dalla miniera, haveva remiers da cunscienzia perquei ch'el haveva anflau quei crap da minerals e cun quei dau igl impuls dad explotar la mina. Cun gronda speranza era el semess all'ovra ed ussa stuev'el constatar che tut mava alla malura. «Pertgei tut quei», sedamonda el en siu manuscret ed anfla la risposta sequenta: «Igl emprem sbagli fuva ch'ins haveva negin plan d'explotaziun per scret; in secund ch'ins haveva negina schelta da cauinterresa e caumenaschi, e il tierz ch'ins vuleva a dispet vegnir rehs. Cuort, ins era buca seprovesius ad uras cun daners ed art.» La cuolpa principala dat el al cauderschader Delatour che haveva engaschau Demenga e Staffoni.

Quels ed auters sbagls han effectuau la decadenza rapida della miniera da Punteglia enteifer paucs onns. Ina radunanza dils 19 da zercladur 1821 sto constatar che Staffoni haveva engreregiau l'interpresa cun indeivet da ca. 100 000 fl., in import che pesava silla mina, sils baghetgs, sils maschinas e mobilias. Il pader vegn incaricaus da mirar per in imprest per saver cuntentar silmeins ils miniers ch'eran restai gia daditg senza paga. Mo sia stenta resta senza success, e cun desperaziun finesch'el siu scriver: «Tgei nezegia ina reha muntogna sche mo tgutgs cultiveschan ed exploteschan ella? Ch'ins spetgi il resultat».

Il resultat fa buca spitgar ditg. L'ovra sto calar cun gronda sperdita, ed enstagl da migliurar la situazion dils avdons da Trun eran els vegni aunc pli paupers. Gronds imports eran i alla malura. Igl onn 1826 surpren ina societad franzosa la fatschenta el medem temps cullas minieras da Sursaisa e Rueun. Mo gia suenter quendisch onns sto era quella societad calar cun bancrut e schar ell'entira cuntrada snavur e malaveglia encunter las minieras.